

И бывает Лития по обычаю.

И поем стихиры Праздника самогласны три, глас 1. Византиево:

В шестый месяц архистратиг по́слан бысть/ к Тебе Деве и Чистой,/ возвести Тебе слово спасения,/ вкупе же и звати Тебѣ:/ Радуйся, Обрадованная, Господь с Тобою./ Родиши Сына Превѣчнаго из Отца// и спасет люди Своя от грѣх их.

Анатолиево: В месяц шестый послан бысть с Небесе Гавриил Архангел,/ во град Галилейский Назарѣт,/ принести Отроковице радость Благовѣщения:/ и пришед к Ней возопи глаголя:/ Радуйся, Обрадованная, Господь с Тобою./ Радуйся, Вместителище невместимаго Естества,/ Егоже бо небеса не вместѣша,/ утроба Твоя вместѣ, Благословенная./ Радуйся, честное Адамово воззваніе,/ Евино избавление и радость міра,// и веселие рода нашего.

Послан бысть Архангел Гавриил с небесе от Бога к Деве нескверней, во град Галилейский Назарет, благовестити ей страннаго образа зачатие. Послан бысть раб безплотен ко одушевленному граду и двери мысленней возвестити Владычняго пришествія снitie. Послан бысть воин небесный ко Пресвятыя Славы Палате, проуготовати зиждителю жилище неотъемлемо. И пришед к Ней взываше: Радуйся, Престоле огнезрачный, четверозрачных преславнейший: Радуйся, седалище Царя Небеснаго. Радуйся, горо несекомая, приятелище пречестное: в Тебе бо все исполнение вселися Божества телесно, благоволением Отца присносущнаго и содейством Всесвятаго Духа. Радуйся, Обрадованная, Господь с Тобою.

Аще суббота или неделя:

Слава, глас 8-й. Иоанна монаха.

Да веселятся небеса и радуется земля: ибо Отцу Соприсносущный, Собезначальный и Сопрестольный, щедротство приемь и человеколюбную милость, Себе постави во истощание, благоволением и советом Отчим: и во утробу вселися Девичу, предочищенную Духом. О, чудесе! Бог в человецех, Невместимый в ложеснах, Безлетный в лето: и еже преславне, яко и зачатие безсеменно, и истощание несказанно, и таинство елико. Бог бо истощавается, и воплощается, и зиждется, ангелу ко Чистой зачатие глаголавшу: Радуйся, Обрадованная, Господь с Тобою, имей велию милость.

И ныне, глас 2:

Благовествует Гавриил Благодатней днесь: Радуйся, Невестная Мати, и Неискусобрачная, не удивляйся странному моему зраку, не ужасайся, Архангел бо есмь. Змий прельсти Еву иногда: ныне же благовествую Тебе радость, и пребудеши нетленна, и родиши Господа, Пречистая.

Аще же день постен: Слава и ныне: Благовествует Гавриил. Таже молитвы обычныя бденія. И вшедше в храм, поем.